

Wárágà Pólò dré tisìle Èfésòbhá i dré dhi

Wárágà kònìdhi ni tà àndu ngìle drìdrì dhi

Kònìdhi wárágà Pólò dré tisìle móndyá ka'ìbhá Èfésò na dhi i dré dhi 'i. Èfésò nda tá bhàandre kàdrì bvò Asíyà àdhya na dhi 'i. Pólò longó tá Rúbí Tani kònàle gò, Gìká ni tà tadházó Èfésòbhá i dré kóná rì tàlì sè, dré tá adrérà'a áyi atsí andre ni na to dhi 'á (Tà 'òle dhi i 19:1–20:1).

Pólò adré wárágà kònìdhi ni tisì tà kàdrìkàdrì rì dhi i sè. Alo ni, adré Rúbí Tani ni tà àndu ngì m̀bhalé tí, adrézó Gìká zì m̀ndí i adrélé ína ró gò, àyi ki apázó tàkonzì lésè Yésu Krísto sè ngíni ya dhi ni tà tadhá. Adré tà lùzu ró Gìká dré kisùle 'òle kínó lésè dhi ni tadhá kònìni: «A ni tà tíí bhù na ìndì bvò dri dhi ki amú bhàle adrélé ópí kàdrì àlo, Krísto zàle» (1:10). Pólò adré kpà Gìká amú m̀ndyá sùrú twá ro dhi i Yúdà ànzi íbe adrélé sùrú àlo ró Krísto na ngíni ya dhi ni tà tadhá (2:11-22).

Rì ni, Pólò adré Yésu ni ka'ìbhá ì kàdré atsilé ngíni ya dhi ni tà tadhá. Adré tàá dhi, mà kòtingá àma ki lídrì àku àma rúsè, lídrì tídhí Gìká dré bhàle adrélé ína tíni dhi ni asózó àma rú (4:20-24). Adré kpà tà tadhá àgo ki tà àyi ki tòkó íbe dhi dri, ànzimvá ki tà àyi ki tibhá íbe dhi dri, ìndì m̀arábà ki tà àyi ki m̀írì íbe dhi dri. Kùdù ro dhi, adré m̀ndyá ka'ìbhá dhi ki kodzó, ì kàdréró àdzú ngá Gìká àdhya ki tosó àyi rú àdzú tirí kònzi íbe dhi ni tà sè (6:10-20).

Tà kàdrìkàdrì wárágà kònìdhi léna dhi ki atìma

- 1) Pólò ni mòdo fèma (1:1-2)
- 2) Krísto ni Rúbí Tani ni tà àndu ngèma (1:3-3:21)
- 3) Lídrì tídhí ro Krísto na dhi (4:1-6:20)
- 4) Pólò ni kúlí kùdù (6:21-24)

Pólò ni mòdo fèma

¹ Ma, Pólò, bhàle adrélé Yésu Krísto ni àpóstolò ro ngóro Gìká dré lèle dhi tíni dhi, má adré wárágà kònìdhi ni tisi àmi, mónnyá lólo Gìká àdhyà Efésò na dhi i dré, àmi adrèbhá Yésu Krísto ni ka'í tà títi i sè dhi i dré.

² Gìká àma ki Atá i Mírì Yésu Krísto be dhi i kòbhà àyi ki togó tani àmi rú, ìndì i kòfè tà kàdrìkàdrì àmi dré!

Tà tani Gìká dré afèle àma dré Krísto na dhi i

³ Rúku kàdré Gìká, àma ki Mírì Yésu Krísto ni Atá dré! Tàko ko, akódhi afè àma dré tà tani títi angábhá í vélésè bhù lésè dhi i, mà dré adrélé Krísto na dhi sè.

⁴ Drìdrì bvò ni bhàma kandrà dhi, zì tá àma adrélé Krísto na, mà kàdréro lólo ìndì tà kònzi àko àma rú í mìlésè be dhi bvó. Akódhi ni lèle sè dhi,

⁵ bhà tá àma twá drìdrì, mà kàtsáro àyi ànzi i ró Yésu Krísto sè, ngóro dré tá lèle 'òle dhi tíni, ìndì ngóro tà nda dré tá adrélé dóro akódhi mìlésè dhi tíni.

⁶ 'O tá kònini, mà kàdréro àyi rú bha kùle, àyi togó tani mìlanzìlanzì ro í dré bhàle àma rú àyi Mv́á í dré lèle tò dhi na dhi ni tà sè.

7 Tàko ko, akódhi ni togó tani kàdrì lavulé nda sè dhi, amù áyi Mvá nda dràle àma ki tàkonzì trizo ìndì àma ki apázó tàkonzì lésè akódhi ni kàrí sè.

8 Tà bàti ró dhi, fè áyi togó tani gàle àma léna bǐ, túmǎní tògyá wǎyi tà títi dhi ki àndu nǐzo dhi be.

9 Tadhá kpà àma dré tà lùzu ró í dré kisùle 'òle ìndì í dré lèle 'òle kínó lésè Krísto na dhi, ngóro dré tá adréle dóro akódhi mìlèsè dhi tǐni.

10 Tà dré lèle 'òle nda, tà kònìdhi 'i: Lókyá kòkìtswá títi dre dhi, a ni tà títi bhù na ìndì bvò dri dhi ki amú bhàle adréle ópí kàdrì àlo, Krísto zàle.

11 Di Gìká bhà àma twá, àma ki zìzo adréle mǒndyá ína í ró Krísto na, ngóro í dré kisùle 'òle kínó lésè dhi tǐni. Tàko ko, akódhi adré tà títi dhi ki 'o ngóro í dré kisùle 'òle, ìndì í dré lèle 'òle dhi tǐni.

12 Di Gìká 'o tà nda kònìni, kitswálé àma àma ki mǐ bhabhá Krísto véna drǐdrǐ dhi i, mà kàdréró Gìká ni rú bha kùle akódhi ni mìlanzìlanzì sè be dhi bvó.

13 Ami ró dhi, mì yi kókpà tà bàti Rúbí Tani àdhya Gìká dré adrézó àmi ki tidrǐ ásà dhi gò, mì dré Krísto ni ka'izo. Di Gìká dré áyi àngì lwàzo àmi rú, tadházóá dhi, àmi mǒndyá ína 'i káyà dhi. Àngì nda, Tírí Lólo Gìká dré lazilé dhi 'i.

14 Tírí Lólo nda ngádrǐ Gìká dré afèle àma dré drǐdrǐ, tadházóá dhi, í ni dra tà í dré lazilé tàyilé ro dhi ni afè àma dré dhi 'i, tsàle lókyá í dré dra àma, mǒndyá ína ró dhi ki apázó kitswálé títi dhi 'á. Di ásà dhi, mà kàdré akódhi ni rú bha kùle

akódhi ni mĩlanzĩlanzi sè wà!

Pólò zi tà Giká tí Efésòbhá i dré

¹⁵ Di àsà dhi, kidhólé lókyá má dré yìzoá tàle dhi, mĩ adré Mírĩ Yésu ni ka'ĩ, adrézó mónnyá lólo Giká àdhyà ki le ngíni ya dhi sè dhi,

¹⁶ má adré àwoyà ta Giká dré àmi ki tà sè landè àko ró. Má adré kpà àmi ki tà kisù, má dré adrèrà'a tà zi Giká tí dhi 'á.

¹⁷ Má adré Giká, àma ki Mírĩ Yésu Krísto ni Atá mĩlanzĩlanzi ro dhi ni ti lizí, kòfèró tògyá Tírĩ Lólo àdhyà àmi dré kitswázó áyi tà lùzu ró dhi ki ni, mĩ kòkitswáró kpà áyi tàndi ni ni dóro lavúlé be dhi bvó.

¹⁸ Má adré kpà tà zi akódhi tí, kò'oró áyi ngádra ngá kazá àmi ki togó na, mĩ kònĩró tà dré àmi ki azizó adrélé mĩ bha í véna àsà dhi i, tùmání tà kàdrì mĩlanzĩlanzi ro dré lazílé áyi mónnyá i dré tàyílé ro dhi be.

¹⁹ Kò'o kpà àmi áyi rĩnyí kàdrì lavúlé adrélépi tà 'o àma adrèbhá áyi ka'ĩ dhi i léna dhi ni ni. Akódhi ni rĩnyí kàdrì lavúlé nda,

²⁰ rĩnyí dré tadhále Krísto rú, dré akódhi ni tĩngàrà'a dràdrà lésè, ìndì akódhi ni 'orà'a lirílé áyi dríagó lésè bhù na dhi 'á dhi 'i.

²¹ Giká bhà Krísto nda adrélé ópí kàdrì títi dhi i drìle, rĩnyí títi adrèzó òpì nya dhi i drìle, rĩnyí àruka títi dhi i drìle, òpì títi dhi i drìle, ìndì rú títi kitswálé fèle lókyá kònìdhi sè ìndì lókyá adrélépi alìle dhi sè dhi i drìle.

²² Bhà kpà tà títi dhi i adrélé Krísto ni pá zàle gò, akódhi ni bhàzo adrélé Èkèlézyà ni drì kòlepi ró tà títi i sè.

²³ Èkèlèzyà nda Krísto ni rúbhá 'i. Akódhi adré Èkèlèzyà nda ni 'o gàle áyi tàndi ni lídrì sè bǐ, ngóro í dré adrélé tà títi dhi ki 'o gàle áyi tàndi sè bǐ dhi tíni.

2

Gìká 'o àma adrélé tùmǎní Krísto be

¹ Wáláká dhi, àmi tá àmíkya móndí dràbhá dre dhi 'i, àmi ki ligìma ni tà sè ìndì àmi ki tàkonzì ki tà sè.

² Lókyá nda sè dhi, mì adré tá tatsílé tàkonzì 'obe, ìndì tà bvò kòndi àdhya ki lebebe. Mì adré tá kpà tirí kònzì ki kàdrì adrélépi òpì kitswálé nòle bwà ko dhi drìle dhi ni lebe. Tirí nda tirí adrélépi tà 'o nyànomvá mónnyá adrèbhá ligílé Gìká rú dhi i léna dhi 'i.

³ Ama títi, àma tá kókpà àyi nda i kòfalé, adrélé tà 'o àyíkya tíni. Mà adré tá tatsílé lovó kònzì àma ki rúbhá kya ki 'obe, ìndì tà mà dré tá adrélé kisùle lovó kònzì nda sè dhi ki 'obe. Ama ki tà làsú kònzì sè dhi, mà adré tá lile Gìká ni kombà kisú àyi nda kya tíni.

⁴ Di, Gìká ni togó dóro lavulé dhi sè, ìndì akódhi ni lèle kàdrì àma véle dhi sè dhi,

⁵ 'o àma adrélé tùmǎní Krísto be, tágba mà dré tá adrézó móndí dràbhá dre dhi 'i àma ki tàkonzì ki tà sè dhi. Tà bàti ró dhi, Gìká tidrì àmi áyi togó tani sè.

⁶ Di mà dré ru amulé Yésu Krísto be dhi sè dhi, Gìká tingá àma kurú na tùmǎní akódhi be, àma ki 'ozo lírìlé bhù na tùmǎní akódhi be.

⁷ Gìká 'o tà nda kònìni, kitswálé lókyá títi adrèbhá alile dhi i sè dhi, í kòtadháro áyi togó

tani kàdrì lavulé, í dré bhàle àma rú Yésu Krísto na dhi be dhi bvó.

⁸ Tàko ko, Gĩká tidrí àmi áyi togó tani sè, àmi ki tà ka'ika'í sè. Tà nda kòdhi angá àmi ki tàndi i vélèsè ko. Be ró dhi, tà nda ína tà Gĩká dré fèle àmi dré àngyá dhi 'i.

⁹ Di akódhi tidrí àmi tà dóro mì dré 'òle dhi i sè ko, dhya àlo kòkìtswáró áyi afà áyi tàndi ni tà sè bwà ko.

¹⁰ Angyá ko, àma ngá Gĩká dré ledélé áyi tàndi ni drígá sè dhi 'i. Akódhi bhà àma tódhyá Yésu Krísto na, mà kàdréró tà dóro í dré bhàle drìdrì àma dré 'òle dhi ki 'o be dhi bvó.

Ama sùrú àlo Yésu Krísto na dhi 'i

¹¹ Di ásà dhi, mì kisù rè ngalè wáláká dhi, àmi tá mómí ngíni ró dhi 'i ya dhi ká. Tàko ko, àmi tá mómí tile sùrú twá ro dhi 'i. Yúdà ànzi adrèbhá àyi ki zi mómí lwàle dhi i ró dhi, i adrè tá àmi ki zi mómí lwàle ko dhi i ró. (Tákò, àyi ki lwàma nda ngbà 'í tà ì dré 'òle àyi ki rúbhá na dhi 'i.)

¹² Wáláká dhi, àmi tá vwàvwà ro Krísto rúsè. Àmi tá twá Gĩká ni sùrú, Isèrèlè ànzi i rúsè. Àmi tá kpà twá tà Gĩká dré bhàle ru yìzo mómíyá ína íbe dhi rúsè, ìndi áyi lazikúlí rúsè. Bvò kòndhi lé dhi, àmi tá Gĩká àko, ìndi tà mì dré tá kìtswázó mì bha ásà dhi tá kpà yókódhó.

¹³ Di, nyànomvá dhi, mì dré ru amulé Yésu Krísto be dhi sè dhi, Gĩká 'o àmi adrèbhá tá vwàvwà ro dhi i atsálé ànyi í làga Krísto ni kàrì sè dre.

¹⁴ Tàko ko, Krísto ni tàndi bhà tà kìdríkìdri àma kòfalé nì. Angyá ko, 'o Yúdà ànzi i mómíyá sùrú twá ro dhi íbe dhi i atsálé sùrú àlo ró, dré áyi

rúbhá fèle dhi sè. 'O kpà zèribà adrélèpi tá àma ki kòfalé lanzi, adrézó àma ki 'o adrélé kàribhá i ró dhi arílé.

¹⁵ 'O kpà tátrítrí kúlí i tà títi tátrítrí kúlí nda dré adrélé tàle à kò'o dhi íbe dhi ki tà akílé. 'O tà nda kòdhi i kitswázó sùrú rí nda ki bha adrélé sùrú àlo tídhí ro dhi ró í léna, adrélé kpà tà kídrikídri íbe.

¹⁶ 'O kpà kònini, kitswálé áyi dràma fa kípakipa dri dhi sè dhi, í kàmúró àyi rí nda i tódhyá Gíká be, i kàtsáro rúbhá àlo ró. Di pfu tà adrélèpi tá àyi ki 'o adrélé kàribhá i ró nda dràle kònini.

¹⁷ Di Krísto nda alì Rúbí Tani tà kídrikídri àdhya ni longó àmi sùrú twá ro adrèbhá tá vwàvwà ro Gíká rúsè dhi i dré, ìndì àma Yúdà ànzi adrèbhá tá ànyi akódhi làga dhi i dré.

¹⁸ Tàko ko, nzi láti àma dré adrézó àma ki kisi àmi íbe ànyi Gíká Atá làga Tirí Lólo àlo sè dhi ni.

¹⁹ Di ásà dhi, àmi sùrú twá ro ni i, àmi vélé móndí twá 'i ko, ìndì móndí angábhá sùrú twá i lésè dhi 'i ko. Be ró dhi, àmi àmikya bhàànzi 'i tùmání móndyá lólo Gíká àdhya íbe. Àmi kpà Gíká ni sùrú akódhi ni dzó lé dhi 'i.

²⁰ Akódhi adó kpà àmi dzó nda ni sizo, àmi ki tobhàzo dzópá í dré bhàle àpóstolò i sè ìndì pròfétà i sè dhi dri. Yésu Krísto ni tàndi, kírà agógó dzó nda dré adrézó áyi totó dríá dhi 'i.

²¹ Akódhi adré dzó wáyi nda ni 'o adrélé kitsílé, adrélé mbàle atsálé tépelò lólo Mirí dré dhi ró dhi ni.

²² Di mì dré adrélé Krísto na dhi sè dhi, Gíká adrè kpà àmi ki tobhà dzó nda ni sizo, dzó nda

kàtsáró àrà í dré adrézó lána áyi Tírí sè dhi ró be dhi bvó.

3

Azì Gìká dré bhàle Pólò drígá mónnyá sùrú twá ro dhi ì dré dhi

¹ Dì ásà dhi, ma, Pólò, ma Yésu Krísto ni mónní 'ìle bǎdzó lé àmì sùrú twá ro dhi kì tà sè dhi 'ì.

² Mì yi tàle dhi, Gìká bhà àzì má drígá áyi togó tani sè, má kàdréró 'òá àmì dré dhi 'í.

³ Tàko ko, akódhi tadhá má dré tà lùzu ró í dré kisùle 'òle kínó lésè dhi, ngóro má dré adrélé tà ni ni tisì tsà dhi tíni.

⁴ Mì kònà tà má dré adrélé tisìle kòdhi ì dhi, m̀ ni kítswá tògyá Gìká dré afèle má dré Krísto ni tà lùzu ró nda ni àndu nìzo dhi ni atógyà.

⁵ Wáláká dhi, Gìká 'o tá tà lùzu ró nda mónní lókyá àruka ì sè dhi ì dré nìle ko. Dì, nyànómvá dhi, tadhá tà nda áyi Tírí ni rìnyí sè áyi àpóstolò lólo ì dré, ìndì áyi pròfétà lólo ì dré dre.

⁶ Dì tà lùzu ró nda, tà kònìdhi 'ì: Rúbí Tani ni ka'ima sè dhi, mónnyá sùrú twá ro dhi ì kisú tà Gìká dré lazìlé áyi ànzi ì dré tàyilè ro dhi tùmání Yúdà ànzi íbe dre. Í atsa kpà rúbhá àlo ró tùmání Yúdà ànzi nda íbe dre. Í kisú kpà tà Gìká dré lazìlé dhi tùmání Yúdà ànzi nda íbe Yésu Krísto na dre.

⁷ Gìká fè ma adrélé Rúbí Tani nda ni màràbà ro áyi togó tani í dré bhàle má rú dhi sè, ìndì áyi rìnyí adrélépi tà 'o má léna dhi sè.

⁸ Tágba má dré tá adrézó mónní tàko ró lavúlè mónnyá títi Gìká àdhya ì kòfalé dhi, akódhi bhà àzì nda má drígá áyi togó tani sè, má kàdréró

Krístico ni tà kàdrì, kitswázó àndu ni ni ni bwà ko dhi ni longó mónnyá sùrú twá ro nda i dré.

⁹ Lè kpà má kàdré tadhá mónnyá títi i dré ngádra 'á dhi, Giká adré tà lùzu ró nda ni 'o ngíni ya dhi. Giká ngá títi dhi ki bhàlepi dhi zù tá tà lùzu ró nda kínó lésè.

¹⁰ 'O tá kònìni, kitswálé nyànomvá dhi, í kòtadháró Èkèlézyà rú áyi tògyá kàdrì í dré adrézó tà títi dhi ki 'o ásà dhi, tirí ópí kàdrì ro ìndì rĩnyi ró kurú na bhù i 'ásè dhi i dré be dhi bvó.

¹¹ Dì Giká 'o tà í dré kisùle 'òle kínó lésè nda kitswálé títi àma ki Mírì Yésu Krístico sè, kàdré ró kóná vésè kólyá.

¹² Dì mà dré adrélé Krístico na dhi sè dhi, ìndì mà dré adrélé akódhi ni ka'ì dhi sè dhi, mà kitswá àma ki kisí ànyi Giká làga tirì àko, ìndì tà ka'ìka'ì be bĩ.

¹³ Dì ásà dhi, má adré àmi ki ti lizí, mì kòtayíró àmi ki togó adrélé lanzìle, má dré adrélé kizà nya àmi ki tà sè dhi sè ko. Tàko ko, má adré kizà nya kònìni, mì kòkitswá ró Giká ni mĩlanzìlanzi kisú be dhi bvó.

Krístico ni lèle ni tà nìma

¹⁴ Dì ásà dhi, má adré àma kórókó titì Giká, àma ki Atá kandrá.

¹⁵ Sùrú títi bhù na ìndì bvò dri dhi ì adré adrélé be akódhi sè.

¹⁶ Má adré tà zi akódhi tí, kitswálé akódhi ni mĩlanzìlanzi kàdrì lavúlé dhi sè dhi, kòtimbàró àmi ki togó áyi Tirí ni rĩnyí sè.

¹⁷ Má adré zĩa kònìni, Krístico kàdré ró adrélé àmi ki togó na àmi ki tà ka'ìka'ì sè. Má adré kpà

tà zi Giká tí, mì kàdréro tròle lèle rú, adrézó àmi kì totó tātā lána,

¹⁸ kitswálé àmi túmání mónnyá lólo títi Giká àdhyà íbe dhi i, mì kòkitswáró Krísto ni lèle ni tàli ángopí ya, kàtswa ni ángopí ya, mvumvù ni ángopí ya, ìndì tálí ni ángopí ya dhi ni ni.

¹⁹ Ayíya, mì kàdré akódhi ni lèle tà nǎnǎ wáyi dhi ni lavúlépi nda ni ni, mì kàdréro gàle Giká ni tàndi ni lídrì sè kitswálé títi be dhi bvó.

²⁰ Giká rǎnyí íbe kitswázó tà 'o, tà mà dré adrélé zìle akódhi tí dhi kì lavú, ìndì tà mà dré adrélé kisùle dhi kì lavú byá, akódhi ni rǎnyí adrélépi tà 'o àma léna dhi sè.

²¹ Milanzilanzì kàdré akódhi dré Èkèlézyà na ìndì Yésu Krísto na, lókyá títi i sè ìndì kóná vèsè kólyá! Kàdré kònini.

4

Adrema ngá àlo ró Krísto ni rúbhá na dhi

¹ Dì ásà dhi, ma 'ìle bǎdzó kòndi 'á Mírì ni tà sè ni, má adré àmi kì kodzó, mì kàdréro atsilé ngóro dré kitswálé tà Giká dré àmi kì azizó ásà dhi sè dhi tíni.

² Mì kàdré àmi kì tà bha kǐni mi tà títi i sè, adrézó tà 'o togó yàya sè, adrézó tà letè togó vwàvwà sè. Mì kàdré àmi kì adrúpi kì tà yàya mvo àmi kòfalésè lèle sè.

³ Mì kàdré tà títi dhi kì 'o, adrézó àmi kì líkì adrélé ngá àlo ró àmi kòfalésè Tírí Lólo na, tà kìdrìkìdrì adrélépi àmi kì fe ru amú dhi sè.

⁴ Krísto ni rúbhá ngbà 'í àlo kwákwá. Tírí Lólo kpà ngbà 'í àlo kwákwá, ngóro tà Giká dré àmi

ki azízó adrélé mǐ bha í véna ásà dhi dré adrélé àlo kwákwá dhi tǐni.

⁵ Mírì ngbà 'í àlo kwákwá, tà ka'íka'í ngbà 'í àlo kwákwá, ìndì bàtísimò ngbà 'í àlo kwákwá.

⁶ Gíká kókpà ngbà 'í àlo kwákwá. Akódhi nda mónnyá títí dhi ki Atá 'i. Adré òpì nya àyi títí dhi i dri, adrézó tà 'o àyi títí dhi i sè, adrézó adrélé àyi títí dhi i léna dhi nì.

⁷ Di, àma àlo àlo títí dhi i, mà kisú tà tani twátwa dhi i, ngóro Krísto dré tà nda ki lanzílé àma dré àyi togó tani sè dhi tǐni.

⁸ Asà dhi, Gíká ni Kúlí adré tàá dhi:
«Akódhi dré tá mbàrà'a kurú na dhi 'á dhi,
drì tá dhya í dré rùle dhi i í vésè gò,
tà tani lanzízó móndí i dré.»*

⁹ Kúlí «akódhi mbà kurú na» kòdhi ì adré leá tàle dhi, akódhi si tá kpà bvò àndúna.

¹⁰ Di akódhi sìlepi nda tá dhya àlo mbàlepi kurú na bhù ki lavú nda 'i, kò'oró bvò wáyi dhi gàle àyi tàndi ni lídrì sè bí be dhi bvò.

¹¹ Di Krísto nda bhà móndí àruka Ekèlézyà le dhi i adrélé àpòstolò i ró dhi nì. Bhà àruka ni i adrélé pròfétà i ró, àruka ni ki bhàzo adrélé Rúbí Tani longóbhá i ró, àruka ni ki bhàzo adrélé Ekèlézyà ni líkíbhá i ró, àruka ni ki bhàzo adrélé tà tadhábhá i ró.

¹² Bhà àyi nda i adrélé kònini, ì kàdréro mónnyá Gíká àdhya ki ledé kitswále títí, ì kàdréro àzi bhàle àyi drígá dhi ki 'o, adrézó Krísto ni rúbhá timbà be dhi bvò.

¹³ A ni adré kònini, tsàle lókyá àma títí mà dré dra atsázó ngá àlo ró àma ki tà ka'íka'í na, ìndì

* 4:8 4:8 A kònò Longó i 68:19.

Gìká nì Mvágó nì nìma na gò, mà dré lì'wázó atsálé Krísto nì tándì t́nì, kitswálé akódhì nì tà sè títí dhi 'á.

¹⁴ Lókyá nda sè dhi, mà kitswá gòle véle adrélé ànzimvá i t́nì ko. A kitswá gòle adrélé àma ki tesé tà tadhále twátwa dhi i sè, ngóro lyãandre dré adrélé bwátù liví, ìndì yí dré adrélé bwátù kãgbã dhi t́nì ko. A kitswá kpà gòle adrélé àma ki tesé móndí adrèbhá láti nda àma ki litízó àyi ki túrúpfú tà sè dhi i sè ko.

¹⁵ Be ró dhi, mà nì àmakya adrè tà bàti ta lèle sè, adrézó mbàle tà títí i sè, atsálé ngóro Krísto adrélépi rúbhá nì drì 'i dhi t́nì.

¹⁶ Akódhì nda adrè rúbhá nì kìgá títí dhi ki 'o ru amú ìndì ru kisú kídri títí adrèbhá àyi ki tì'ì dhi i sè, atsálé rúbhá àlo ró dhi nì. Dì rúbhá nì kìgá àlo àlo títí dhi i kàdré àyi ki àzì 'o dhi, rúbhá wáyi nda adrè mbàle atsálé r̀nyi ró lèle na.

Lídri t́dhi ro Krísto na dhi

¹⁷ Dì ásà dhi, má adrè àmì ki kodzó tà tándì ró Mírì nì rú sè, mì kògòro véle adrélé atsilé ngóro págánò ì dré adrélé atsilé àyi ki tà kisùkisù àngyá na dhi t́nì ko.

¹⁸ Àyi ki tà kisùkisù nda atsá tinimvá ro gò, ì dré adrézó vwàvwà ro lídri Gìká àdhya rúsè, ì dré àyi ki togó 'òle tombále gò adrézó tà nìni àko dhi sè.

¹⁹ Àyi ki togó andírì gò, ì dré àyi ki fèzo adrélé tà swà 'o, adrézó kpà tà ndì ró dhi ki kára títí dhi ki 'o lovó sè.

²⁰ Dì, àmì ró dhi, mì kisú àmìkya Krísto nì tà nìle dhi kònìni ko.

21 Tàko ko, m̀i yi tá akódhi ni tà gò, à dré tà bàti adrélépi akódhi léna dhi ni tadházó àmi dré dhi 'í.

22 Kàdré d̀i àmi ki atsimá wáláká dhi ni tà sè dhi, lè m̀i kòtingá àmi ki lídrì àku àmi rúsè. Angyá ko, lídrì àku nda adré dràle dràdrà lovó kònzì adrèbhá akódhi ni lití dhi i sè.

23 Kòdhi íbe dhi, m̀i kòtayí àmi ki tà kisùkisù Tírí Lólo dré adrélé ladzálé atsálé tídhí ro.

24 M̀i kàsó kpà àmi rú lídrì tídhí Gíká dré bhàle adrélé ína tíni dhi, m̀i kòkitswáró atsílé tà gyägya na, tà bàti na, ìndì tà lólo na be dhi bvó.

25 D̀i àmi àlo àlo títi dhi i, m̀i kòtayí kìnzò tàma, adrézó tà bàti ta àmi ki adrúpi i dré. Angyá ko, àma títi dhi i rúbhá àlo ni kìgá 'i.

26 Àmi ki togó kàdré aswálé dhi, m̀i kòtayí àmi adrélé tàkonzì 'o àsà ko. M̀i kòtayí kpà kítú ndile àmi ki togóaswa nda dri ko.

27 M̀i kòfè látì Dzáborò dré kitswázó tà 'o àmi ki togó na dhi ko.

28 Lè dhya ángùdhi adrélépi ngá kugù dhi, kògò adrélé ngá kugù ko. Be ró dhi, akódhi nda kàdré àzì 'o áyi tàndi ni drígá sè adrézó adrílé àsà, kòkitswáró kpà ngá lanzí lemerèbhá i dré be dhi bvó.

29 M̀i kòtayí kúlí kònzì àlo dhi apfòle àmi sílésè ko. Be ró dhi, m̀i kàdré ngbà 'í kúlí dóro kitswábhá àmi ki adrúpi ki tìmbà àyi ki tà ka'íka'í na dhi ki ta kòdhya, kitswázó àyi adrèbhá àmi ki yi dhi ki ledé àsà.

30 M̀i kòfè kizà Tírí Lólo Gíká àdhya dré ko. Tàko ko, Gíká afè Tírí nda àmi dré ngóro àngì lwàle àmi rú dhi tíni, tadházóá dhi, í ni àmi ki

apá kitswálé títi kítú í dré bhàle dhi tú.

³¹ Mì kòtingá àmi rúsè togó kùdzí, togóaswa, kombà, kótrétré, làdhá i, ìndì tà kònzì kì kárá títi dhi íbe.

³² Dì, mì kàdré àmìkya dóro, adrélé àmi kì togó dóro tadhá àmi kòfalésè. Mì kàdré kpà àmi kì adrúpi kì tàkonzì tri àmi kòfalésè, ngóro Gìká dré àmi kì tàkonzì trìle Krísto na dhi tìni.

5

Atsima ngádra 'ásè dhi

¹ Dì àmi, Gìká nì ànzì dré lèle tò nì i, mì kàdré tà 'o akódhi àdhya tìni.

² Mì kàdré kpà atsílé lèle na Krísto àdhya tìni. Tàko ko, akódhi nda lè àma tò gò, áyi lídrì fèzo àma kì tà sè, ngóro mòbòmà tàdzí be dóro fèle Gìká dré dhi tìni.

³ Adré lèá dhi, ndòtò tà, tà ndì ró dhi i, ngá lovó be dhi ì kàdré àmi kòfalé àlomvá ko. Angyá ko, tà nda kòdhi ì kitswá mónnyá lólo Gìká àdhya i sè ko.

⁴ Adré kpà lèá dhi, ndòtò kúlí i, kúlí azaaza i, ìndì kúlí wàyá adrézó lenzélé ásà dhi íbe dhi ì kàdré àmi kòfalé yókódhó. Kúlí làsú be kònìni nda ì kitswá kpà àmi sè ko. Be ró dhi, mì kàdré àmìkya kúlí adrézó àwoyà fe Gìká dré dhi kì ta kòdhya.

⁵ Tàko ko, mì nì dóro tàle dhi, mónnyá adrèbhá ndòtò tà 'o dhi i, mónnyá adrèbhá tà ndì ró dhi kì 'o dhi i, ìndì mónnyá adrèbhá ngá lovó bha dhi íbe dhi kì àlo kitswá fìle Opì Krísto kya Gìká be

dhi na ko dhi. (Dhya ángùdhi adrélépi ngá lovó bha dhi ína gĩká tàko kị lindrì bhàlepi 'i.)

⁶ Mì kòtayí àmi dhya àlo dré litílé kúlí tàko ì sè ko. Tàko ko, tà kònzi làsú be kònini dhi ì adré Gĩká ni kombà asé mónnyá adrébhá ligílé akódhi rú dhi ì dri.

⁷ Asà dhi, lè mì kòsù ru àyi nda íbe ko, adrézó kpà tà 'o àyi íbe ko.

⁸ Tàko ko, wáláká dhi, àmi tá tínímvá 'i. Dì, nyànomvá dhi, àmi àmikya ngádra 'i Mírì Yésu na. Mì kàdré dì atsílé ngóro ànzi ngádra àdhya ì tíni.

⁹ Angyá ko, lò'wa dóro mónnyá ngádra 'á dhi ì dré adrélé 'àle dhi ì, kòni 'i: tà dóro títi dhi kị 'òma, tà gyágya 'òma, ìndì tà bàti tàma.

¹⁰ Mì kàdré tà Mírì ni togó dré adrézó kinílé ásà dhi kị nda nìle kòdhya.

¹¹ Mì kòsù ru tà tàkotàko mónnyá tínímvá na dhi ì dré adrélé 'òle dhi íbe ko. Be ró dhi, mì kàdré àmikya tà nda kị tadhá ngádra 'á.

¹² Tàko ko, ndìndì tà mónnyá nda ì dré adrélé 'òle lùzu ró dhi kị tàma adré kanyò fe.

¹³ A adré ngá títi adrélé tadhále ngádra 'á dhi kị no dóro.

¹⁴ Kòdhi íbe dhi, ngá títi ngádra dré adrélé tadhále dhi ì adré kpà atsále ngádra ró. Ásà dhi, à adré tàá dhi:

«Mì adrélépi ayí ko ni, mí kòlaró ayí lésè, ìndì mí kàngá dràdrà lésè gò,
Krísto kò'oró áyi ngádra kòle àmi kazá.»

¹⁵ Dì ásà dhi, mì kònò dóro ngalè mì adré atsílé ngíni ya dhi. Mì kàdré atsílé ngóro móndí azaaza

i tíni ko. Be ró dhi, mì kàdré àmíkya atsílé ngóro tògyabhá i tíni.

¹⁶ Mì kàdré lókyá wáyi mì dré adrézó ába dhi ki líkí, adrézó tà dóro 'o ásà. Angyá ko, kítú kòni i kònze lavúlé.

¹⁷ Mì kàdré dì móndí azaaza i ró ko. Be ró dhi, mì kàdré àmíkya tà Mírì dré adrélé lèle mì kò'o dhi ki nda nìle kòdhya.

¹⁸ Mì kòtayí àmi wá dré adrélé tsìle ko. Tàko ko, wá nda adré móndí ki tidrì adrélé tà swà 'o dhi nì. Be ró dhi, mì kàdré àmi ki tayí adrélé gàle Tírí Lólo sè.

¹⁹ Mì kàdré longó Gìká nì Kúlí na dhi ki ngo, tùmání longó adrézó Gìká nì rú bha kùle dhi íbe, ìndì longó adrèbhá angalé Tírí Lólo vélésè dhi íbe, adrézó ru timbà àmi kòfalésè. Ayíya, mì kàdré longó ngo Mírì dré, adrézó lenzélé akódhi nì rú sè togó wáyi sè.

²⁰ Kòdhi íbe dhi, mì kàdré ngbú àwoyà ta Gìká àma ki Atá dré tà títi i sè, àma ki Mírì Yésu Krísto nì rú sè.

Ago ki tà àyi ki tòkó íbe dhi

²¹ Lè mì kàdré àmi ki bha àmi ki àzya i zàle àmi kòfalésè, Krísto nì lindrì bhàma sè.

²² Àmi tòkó i, mì kàdré àmi ki drì asó àmi ki àgo i kandrá, ngóro mì dré adrélé 'òle Mírì kandrá dhi tíni.

²³ Tàko ko, agó ína tòkó drìle, ngóro Krísto dré adrélé Èkèlézyà drìle dhi tíni. Krísto nda, Èkèlézyà adrélépi akódhi nì rúbhá ro dhi nì tidrìlépi 'i.

24 Di ngóró Èkèlézyà dré adrélé áyi bha Krísto zàle dhi t́ni dhi, lè tòkó ì kàdré kókpa àyi ki bha àyi ki àgo ì zàle tà títí ì sè.

25 Ami àgo ì, lè mì kàdré àmi ki tòkó ki le, ngóró Krísto dré Èkèlézyà ni lèle tò gò, áyi lídrì fèzo akódhi ni tà sè dhi t́ni.

26 Akódhi 'o kònìni, Èkèlézyà nda ni temvézó ý akódhi ni dzìzo ásà dhi sè ìndì Gìká ni Kúlí sè, akódhi ni 'òzo atsálé lólo Gìká dré,

27 í kò'oró akódhi apfòle í kandrà Èkèlézyà m̀lanzìlanzì ro dhi ró, ndí àko, rúbhá àdé àko, ìndì tà àzya kitswálépi ko dhi àko, akódhi kàdré ró lólo ìndì tà kònzi àko í rú be dhi bvó.

28 Kókpa kòdhi t́ni, lè àgo ì kàdré àyi ki tòkó ki le, ngóró ì dré adrélé áyi ki tàndi ki rúbhá ki le dhi t́ni. Agó adrélépi áyi tòkó ni le dhi adré áyi tàndi ni le kòdhya.

29 Angyá ko, dhya àlo gà áyi tàndi ni rúbhá tàdzí rè ko. Be ró dhi, adré ína ngá fe áyi rúbhá dré nyàle, adrézó rúbhá nda ni líkí dóro, ngóró Krísto dré adrélé 'òle Èkèlézyà dré dhi t́ni.

30 Tàko ko, àma akódhi ni rúbhá ni kìgá 'i.

31 Ngóró Gìká ni Kúlí dré adrélé tàle dhi t́ni: «Ásà dhi, agó ni áyi atá ni tayí áyi andre be, ru amúzó áyi tòkó be gò, àyi rítì nda ì dré atsázó rúbhá àlo ró.»*

32 Tà nda kòdhi, tà kàdrì lùzu ró dhi 'i. Di, má adré mána tà nda ni ta Krísto ni tà dri, ìndì Èkèlézyà ni tà dri.

33 Tágba kònìni dhi, lè àmi àlo àlo títí dhi ì mì kàdré àmi ki tòkó ki le, ngóró mì dré adrélé àmi

* 5:31 5:31 A kònò Kidhoma 2:24.

ki tàndi ki le dhi t́ni. Adré kpà lèá dhi, tòkó ì kàdré àyi ki àgo ki lindrì bha.

6

Anzimvá ki tà àyi ki tibhá íbe dhi

¹ Ami ànzimvá i, lè mì kàdré àmi ki tibhá ki kúlí ka'í 'òle, mì dré adrélé Mírì na dhi sè. Tàko ko, tà nda kòdhi tà gyàgya 'i.

² «Mí kàdré àmi atá ni lindrì bha àmi andre be.» Tòlì nda kòdhi tòlì Gíká dré fèle drìdrì túmání lazikúlí be dhi 'i.

³ Lazikúlí nda, kònìdhi 'i: «Mí kàdré àmi atá ni lindrì bha àmi andre be, mí kàdréro arí íbe, adrézó kpà lídrì íbe bvò kònìdhi dri lókyá be vwàvwà ro be dhi bvò.»*

⁴ Ami, ànzi ki atá i, mì kàdré àmi ki ànzimvá ki togó 'o aswálé àngyá ko. Be ró dhi, mì kàdré àmíkya àyi ki líkí, adrézó àyi ki tadhá ìndì àyi ki lotó Mírì ni tà sè.

Màràbà ki tà àyi ki mírì íbe dhi

⁵ Ami màràbà ró ni i, mì kàdré àmi ki mírì bvò kòndi àdhya ki kúlí ka'í 'òle togó dóro sè, àyi ki lindrì bhàma sè, ìndì àyi ki ròma sè, ngóro mì dré adrélé 'òle Krísto dré dhi t́ni.

⁶ Dì, mì kàdré ngbà 'í àyi ki kúlí ka'í 'òle àyi mi, àmi ki tà kàdréro dóro àyi m̀lèsè dhi bvó ko. Be ró dhi, mì kàdré àmíkya àyi ki kúlí ka'í 'òle togó wáyi sè ngóro màràbà Krísto àdhya i t́ni, adrézó tà Gíká dré adrélé lèle mì kò'o dhi ki 'o tà nda sè.

* 6:3 6:3 A kònò Pfòma 20:12; Dùtèrònómè 5:16.

⁷ Mì kàdré àmi ki àzì 'o màràbà i ró togó wǎyi sè, adrézó 'oá ngóro móndí i dré dhi t́ni ko, be ró dhi, ngóro Mírì ni tándi dré dhi t́ni.

⁸ Tàko ko, mì nǐ tàle dhi, Mírì ni làgí fe móndí àlo àlo títí i dré tà dóro i dré 'òle dhi i tí, i kàdré gba màràbà 'i yà, kó ngalè móndí màràbà ro ko dhi 'i yà dhi be.

⁹ Ami mírì ro ni i, mì kàdré kókpà 'oá kònini àmi ki màràbà i véna. Mì kògò véle adrélé kúlí aswaaswa ta àyi dri ko. Tàko ko, mì nǐ tàle dhi, àmi ki Mírì bhù na dhi kókpà àyi ki Mírì 'i dhi be. Akódhi nda adré kpà móndí ki no twátwa ko.

Adzú ngá Giká àdhya ki tosoma

¹⁰ Kùdù ro dhi, mì kàdré rinyi ró Mírì na, ìndì akódhi ni rinyí kàdrì lavúlé dhi na.

¹¹ Mì kàdré àdzú ngá títí Giká dré adrélé afèle dhi ki tosó àmi rú, mì kòkìtswáro àmi ki totó tātā tà Dzaborò dré adrézó àmi ki tabhì litílé ásà dhi i kandrà be dhi bvó.

¹² Tàko ko, mà adré ru pfu móndí rúbhá be ìndì kàrí be dhi íbe ko. Be ró dhi, mà adré àmakya ru pfu tirí kònzì ki kàdrì adrèbhá kurú na bhù i 'ásè dhi íbe, àyi adrèbhá ópí kàdrì i ró ìndì rinyi ró, adrèbhá òpì nya bvò t́nínvá ro kòndi drìle dhi íbe.

¹³ Dì ásà dhi, mì kàdré àdzú ngá títí Giká àdhya ki tosó àmi rú, kítú kònzì kònì dra atsá dhi, mì kòkìtswáro pá sì àmi ki kàribhá i kandrà gò, àdzú nda àmvolésè dhi, mì kàdréro dhu rè àmi ki totó tātā be dhi bvó.

¹⁴ Mì kàdré dì àmi ki totó adrélé gànzi ró. Mì kò'ì àmi ki kípíle 'á káfà tà bàti àdhya kòdhya.

Mì kàsó àmi agá aya tà gyăgya àdhya kitswázó àmi kì líkí dhi kòdhya.

¹⁵ Mì kòtosó àmi pá kámókà adrézó gánzi ró ìlè Rúbì Tani tà kàdríkàdri àdhya ni longó ásà dhi i kòdhya.

¹⁶ Tà títi dhi i sè dhi, mì kòru àmi drígá àgbáwù àmi kì tà ka'ika'ì àdhya kòdhya, mì kòkitswáró kíyá títi àtsi ró Dhya kònzi dré adrézó àmi kì bhu ásà dhi kì àtsí kídri be dhi bvó.

¹⁷ Mì kàsó àmi dri kátabhúlà aya ró tà àmi kì tidrízó dhi àdhya kòdhya. Mì kòru àmi drígá sápi Tírí Lólo àdhya kòdhya. Sápí nda Gíká ni Kúlí 'i.

¹⁸ Kòdhi íbe títi dhi, mì kàdré ngbú tà zi Gíká tí, adrézó tongolé akódhi rú Tírí Lólo ni rinyí sè. Mì kàdré 'óà kònini adrézó kpà tàmbà dri. Mì kàdré kpà tà zi Gíká tí mómnyá lólo títi akódhi àdhya i dré landè àko ró.

¹⁹ Mì kàdré kpà tà zi Gíká tí má dré, má kònì dra tà ta dhi, kàfèró kúlí má dré kitswázó tà lùzu ró Rúbì Tani àdhya ni longó tirí àko be dhi bvó.

²⁰ Rúbì Tani nda ni tà sè dhi, ma mómndí 'ìlè bǎdzó lé adrélépi Krísto ni tà longó akódhi ni rú sè dhi 'i. Mì kàdré di tà zi Gíká tí, má kàdréro Rúbì Tani nda ni longó tirí àko, ngóro dré kitswálé má kòlongó dhi tìni.

Pólò ni kúlí kùdù

²¹ Ama kì adrúpi Tíkíkò mà dré lèlè tò dhi, ni tà títi dhi kì longó àmi dré, mì kòyiró áma rúbì, tùmǎní tà má dré adrélé 'òlè dhi íbe. Akódhi nda Mírì ni àzì 'òlepi, kitswálé ka'ìlè togó wǎyi sè dhi 'i.

²² Má adré di akódhi ni mu àmi véna tà nda sè, mì kòniró ngalè àma ngíni ya dhi, ìndì akódhi kòtimbàró àmi àmi ki tà ka'ika'ì na.

²³ Gĩká àma ki Atá tùmání Mírĩ Yésu Krísto be dhi ì kòfè tà kìdríkìdri, lèle, ìndì tà ka'ika'ì íbe àmi, àma ki adrúpi i dré!

²⁴ Gĩká ni togó tani kàdré mónnyá tíí adrébhá àma ki Mírĩ Yésu Krísto ni le lèle kítswálépi akilé bwà ko dhi sè dhi i dré!

Logo (Logoti)
Logoti (Logo): BUKU TA TIDHI//RU YIZO DHI ADHYA
New Testament

copyright © 2015 Wycliffe Bible Translators, Inc.

Language: Logo

Contributor: Wycliffe Bible Translators, Inc.

All rights reserved.

2025-05-10

PDF generated using Haiola and XeLaTeX on 10 May 2025 from source
files dated 10 May 2025

942af0a0-42ea-5477-8f1a-fed39823f32b